

SCÉIM MAIDIR LE hARDÚ CÉIME INMHEÁNACH CHUN GHRÁD AN OLLAIMH (CATHAOIR PHEARSANTA) IN OLLSCOIL LUIMNIGH

1. Réamhrá

- 1.1 Is éard is cuspóir don Scéim seo ná foráil a dhéanamh maidir le hardú céime inmheánach chun ghrád an Ollaimh (Cathaoir Phearsanta).
- 1.2 Is é grád an Ollaimh an grád acadúil is airde i struchtúr na hOllscoile. Féadfar iarrthóirí a bhreithniú chun a n-ardaithe go dtí an grád seo nuair a bheidh na caighdeáin oirrcis acadúil agus torthaí acadúla atá ag teacht leis an ngrád seo bainte amach acu. Is de réir caighdeán idirnáisiúnta agus ar bhonn fianaise a dhéanfar moltóireacht ar ardú chun grád Ollaimh. Ceanglófar ar iarrthóirí ar ardú céime chun ghrád an Ollaimh clú idirnáisiúnta a bheith orthu ar bhonn foilseachán marthanach ardéifeachta agus fianaise a bheith acu ar cheannasaíocht acadúil shuntasach a bheith bainte amach acu san Ollscoil agus/nó sa chomhphobal idirnáisiúnta.

2. Critéir Mheastóireachta

- 2.1 Is mar seo a leanas a bheidh na critéir mheastóireachta i gcomhair ardú céime chun grád an Ollaimh (Cathaoir Phearsanta):
 - (i) Taighde agus Scoláireacht
 - (ii) Ceannasaíocht Acadúil
 - (iii) Múineadh agus Foghlaim
 - (iv) Cuidiú a tugadh don Ollscoil agus don phobal as a iomláine
- 2.2 Ceanglófar feidhmíocht shásúil maidir leis na critéir go léir. Is ar na critéir maidir le Taighde agus Scoláireacht agus Ceannasaíocht Acadúil is mó a dhíreofar sa mheastóireacht chun ardaithe céime. In imthosca neamhghnácha, féadfaidh iarrthóir a mhaíomh gur chóir an mheastóireacht a dhíriú go príomha ar na critéir a bhaineann leis an gCeannasaíocht Acadúil agus Múineadh agus Foghlaim ar bhonn mórghnímh dhearsnaithigh sa cheannasaíocht acadúil mar aon le haithint idirnáisiúnta agus mórghníomhartha arna n-athbhreithniú ag lucht a chomhchéime nó lucht a comhchéime maidir le scoláireacht an Mhúinte agus na Foghlama agus/nó an nuálaíocht oideolaíoch.

3. Incháilitheacht

- 3.1 Ní mór de ghnáth iarrthóir a bheith ar leibhéal an Ollaimh Chomhlaigh le cúig bliana ar a laghad ar dháta an iarratais. In imthosca neamhghnácha, féadfaidh an tUachtarán na critéir seo a tharscaoileadh ar scór cás i scríbhinn ina léireofar fianaise ar na caighdeáin idirnáisiúnta maidir le hoirirceas acadúil agus torthaí acadúla atá ag teacht le grád an Ollaimh a bheith bainte amach ag an iarrthóir. Ní fhéadfar iarrthóir a bhreithniú níos mó ná aon uair amháin in aon tréimhse trí bliana.

4. Próiseas

- 4.1 Aon iarrthóir ar mian leis nó léi go mbreithneofaí lena ardú é nó lena hardú í, déanfaidh sé nó sí iarratas san fhormáid riachtanach a sheoladh go dtí Rannóg Earcaíochta, Roinn Achmhainní. Tá an fhoirm iarratais ar fáil ag [Personal Chair Application Form](#). Beidh fianaise ar ghnóthachtáil ag teastáil faoi gach ceann de na critéir. Tá samplaí de na cineálacha fianaise ar chion láimhe agus ar ghnóthachtáil a bheadh oiriúnach d'ardú céime chun ghrád an Ollaimh (Cathaoir Phearsanta) iniata i bhFoscúbhinn 1 a ghabhann leis an doiciméad seo. Mar liosta comharthach amháin atá an liosta seo beartaithe. Ní mór doiciméid a sholáthar i gcomhair na huile fhianaise. Lena chois sin, iarrfar ar an iarrthóir breac-chuntas a thabhairt ar an gcaoi a gcuideoidh sé nó sí le spriocanna straitéiseacha na hOllscoile agus ar an gcion láimhe a bheartóidh sé nó sí a dhéanamh sna cúig bliana atá le teacht.
- 4.2 Iarrfar ar gach iarrthóir cúig cinn de thuarascálacha moltóra acadúla a chur ar fáil i dteannta a iarratais nó a hiarratais. Déanfar measúnú ar fhiúntas éachtaí taighde agus scoláireachta an iarrthóra agus ar an gceannasaíocht acadúil atá léirithe aige nó aici i dtrí cinn ar a laghad de na tuarascálacha sin; athbhreithneoirí seachtracha ar ceannasaithe atá aitheanta go hidirnáisiúnta i réimse an iarrthóra iad a thabharfaidh na tuarascálacha sin. Ba chóir i bhformhór na gcásanna nach comhoibritheoirí nó comhúdair leis an iarrthóir i láthair na huaire nó le deireanas iad na daoine sin. Déanfar measúnú in aon tuarascáil amháin ar a laghad ar a mbeidh déanta ag an iarrthóir ar son an mhúinte agus na foghlama. Féadfaidh an Ollscoil iad sin a cheadú nó dul i gcomhairle le measúnóirí seachtracha cuí eile a roghnóidh an tUachtarán.
- 4.3 Déanfar gach dícheall chun an próiseas a thabhairt chun críche faoi cheann sé mhí.

5. Painéal Meastóireachta

- 5.1 D'fhonn iarratas ar ardú céime chun ghrád an Ollaimh (Cathaoir Phearsanta) a bhreithniú, déanfaidh an tUachtarán Painéal Meastóireachta a chur ar bun. Is é nó is í an tUachtarán a dhéanfaidh cathaoirleacht ar an bPainéal agus beidh cúigear Ollamh de chuid na hOllscoile agus beirt mheasúnóirí seachtracha ar a laghad air. Beidh idir fhir agus mhná ar an bPainéal Meastóireachta.
- 5.2 Ní fhágfaidh comhalta gan a bheith ar fáil go mbeidh an Painéal Meastóireachta neamhbhailí. Má ráiníonn nach mbeidh comhalta den Phainéal Meastóireachta ar fáil, beidh sé de rogha ag an Uachtarán duine a ainmniú chun ionad an chomhalta sin a dhéanamh nó a chinneadh nach leanfar leis an bPainéal Meastóireachta.

- 5.3 Is é ról an Phainéil Meastóireachta ná measúnú a dhéanamh i dtaobh ardú céime chun ghrád an Ollaimh (Cathaoir Phearsanta) a bheith tuillte ag an iarrthóir nó neachtar acu gan a bheith tuillte aige nó aici. Déanfar an measúnú sin de réir na gcaighdeán agus na gcritéar a bhfuil breac-chuntas tugtha thuas orthu. Cuirfidh an Painéal Meastóireachta an t-iarrthóir faoi agallamh, déanfaidh sé an fhianaise a sholáthrófar i leith an iarratais a bhreithniú agus má mheasann sé gur cuí déanamh amhlaidh, molfaidh sé don Údarás Rialúcháin, ar mhodh tuarascála réasúnaithe, an t-iarrthóir a cheapadh mar Ollamh (Cathaoir Phearsanta).
- 5.4 Cé gur chóir don Phainéal Meastóireachta gach dícheall a dhéanamh le teacht chun comhréitigh, más amhlaidh nach féidir sin, ní mór sa chás sin 75% ar a laghad den Phainéal a bheith ag tacú le moladh maidir le hardú céime.
- 5.5 Coimeádfaidh an Painéal Meastóireachta taifid oiriúnacha ina mbeidh an fáth nó na fáthanna lena gcinneadh. Déanfar an fáth nó na fáthanna leis an gcinneadh a chur ar fáil d'iarrthóir nach molfar chun a cheaptha nó chun a ceaptha.
- 6. Athbhreithniú**
- 6.1 Féadfaidh iarrthóir nach mbeidh éirithe leis nó léi athbhreithniú a iarraidh, ar an aon fhoras amháin gur imíodh go follasach ó théarmaí na scéime seo, rud a d'imir ar thoradh an phróisis maidir leis an iarrthóir.
- 6.2 D'fhoill athbhreithniú den sórt sin a iarraidh, déanfaidh iarrthóir aighneacht i scríbhinn ina leagfar amach na forais go léir lena iarraidh nó lena hiarraidh ar athbhreithniú agus seolfaidh sé nó sí go dtí an Leas-Rúnaí í faoi cheann aon mhí amháin tar éis dó nó di fógra a fháil i dtaobh thoradh a iarratais nó a hiarratais.
- 6.3 Déanfaidh an tÚdarás Rialúcháin ar fhógra i dtaobh iarraidh ar athbhreithniú a fháil dó, duine neamhspleách seachtrach a cheapadh chun an t-athbhreithniú a stiúradh agus chun cinneadh réasúnaithe a sholáthar dó, is cinneadh a chuirfear ar fáil don iarrthóir.

FOSCRÍBHINN 1

Taighde agus Scoláireacht

Aithint idirnáisiúnta mar thaighdeoir agus scoláire a chruthú. Féadfar é sin a chruthú le fianaise de shórt na nithe seo a leanas:

- Líon substaintiúil d'fhoilseacháin, de leabhair, de chaibidlí leabhair nó de mhonagraif urraithe taighde (Iarrfar fianaise ar thionchar.)
- An líon mac léinn taighde a ndearnadh maoirseacht orthu go dtí gur tugadh a gcuid staidéir chun críche
- Gasra, Ionad, Institiúid shubstaintiúil taighde, nó saoráidí nó cláir shubstaintiúla taighde a chruthú/agus nó ceannasaíocht ar an gcéanna
- Teist shuntasach ar an iarrthóir i dtaca le cistí taighde a fháil lena n-áirítear an cumas chun cistí a tharraingt ó ghníomhaireachtaí deontas taighde a ndéanann comhpháirtithe seachtracha athbhreithniú orthu.

Ceannasaíocht Acadúil

Cruthúnas go bhfuil éirithe leis an iarrthóir mórfheidhmeannas ceannasaíochta a chomhall san Ollscoil agus/nó sa chomhphobal náisiúnta nó idirnáisiúnta. Beidh na nithe seo a leanas ina samplaí d'fhianaise den sórt sin:

- Ardfhiúntas, bainisteoireacht, ceannasaíocht agus riarachán a bheith léirithe ag an iarrthóir san Ollscoil mar is follasach ó fheidhmíocht rathúil i bpost ceannasaíochta san Ollscoil de shórt Déin nó Ceann Roinne
- Ceannasaíocht ar thionscnaimh chomhoibritheacha ildisciplíneacha nó ileagraíochtúla
- Fobairt agus ceannasaíocht ar chláir nua staidéir lena n-áirítear forbairt ghairmiúil leantach agus cláir chianfhoghlama
- Ceannasaíocht rathúil, mharthanach ar chláir staidéir
- Ceapachán/toghadh i bpoist ríthábhachtacha i gcomhlachtaí náisiúnta nó idirnáisiúnta
- Poist eagarthóireachta in irisí acadúla agus gairmiúla ardéifeachta
- Feidhmíocht rathúil mar Chathaoirleach ar Choistí Coláiste nó Ollscoile
- Seirbhís mar Scrúdaitheoir Seachtrach/Ollamh Cuairte
- Cion láimhe suntasach mar Chathaoirleach nó mar Chomhalta de Chomhlachtaí Comhairliúcháin de chuid an Rialtais.

Múinteoireacht agus Foghlaim

Cruthúnas ar bharr feabhais i gcion oibre an iarrthóra i leith na múinteoireachta agus na foghlama a bheidh soláthartha trí chúram múinteoireachta. Féadfaidh go mbeidh na nithe seo a leanas ina bhfianaise:

- Cruthúnas ar oirirceas náisiúnta nó idirnáisiúnta sa mhúinteoireacht agus san fhoghlaim
- Cion oibre marthanach, ardphiúntais ar son scoláireacht na múinteoireachta agus na foghlama
- Tiomantas dearscnaitheach i leith na múinteoireachta mar is léir ó dhea-theist mharthanach maidir le modúil atá múinte agus tionscnaimh bhliana deireanaí a bhfuil maoirseacht déanta orthu
- Barr feabhais sa mhúinteoireacht mar is léir ó mheastóireachtaí mac léinn, bronntaí múinteoireachta nó ainmniúcháin, duaiseanna nó tuiriscí tuairime ag comhpháirtithe
- Nuálaíocht mharthanach a bhfuil éirithe léi i dtaca le curaclaim a leagan amach, a chur ar fáil agus a athbhreithniú agus i dtaca le teicneolaíocht a úsáid
- Fianaise ar nuálaíocht oideolaíoch a bhfuil éirithe léi
- Fianaise ar aitheantas náisiúnta agus/nó idirnáisiúnta ag comhlachtaí gairmiúla
- Téacsleabhair a bheith foilsithe.

Cuidiú leis an Ollscoil agus leis an gComhphobal as a Iomláine

Cruthúnas ar éacht substaintiúil a bheith déanta i dtaca le cuidiú na hOllscoile lena cuid comhphobal a mhéadú. Féadfaidh go mbeidh na nithe seo a leanas ina fhianaise faoin mhírcheann seo:

- Rannpháirtíocht i ngnóthaí poiblí agus cuidiú le beartas poiblí a fhorbairt
- Cuidiú le comhghleacaithe trí rólanna meantóireachta nó comhairliúcháin
- Cuidiú gníomhach marthanach le Coistí Ollscoile nó Coláiste
- Lámh i ngníomhaíochtaí margaíochta, cur chun cinn agus bailithe airgid thar ceann na hOllscoile
- Tionscnaimh rochtana a fhorbairt agus páirt a ghlacadh iontu
- Páirt a ghlacadh i gcomhpháirtíochtaí le gníomhaireachtaí áitiúla, réigiúnacha agus náisiúnta
- Rannpháirtíocht rathúil a dhéanamh le gníomhaireachtaí seachtracha thar ceann na hOllscoile
- Cuidiú substaintiúil le saol intleachtúil, cultúrtha nó eacnamaíoch na hOllscoile, le coistí áitiúla nó réigiúnacha.